

Segun Papito Comenencia:

No ta exclui cu mas detencion por cay relaciona cu caso Holloway



ORANJESTAD (AAN) — Diamars atardi miembronan di prensa tanto local como di Merca, a reuni cu vocero Policial Papito Comenencia, e representante di Ministerio Publico sra. Vivian van der Biezen y Ruben Trappenberg, vocero di gobierno, unda a base di pregunta y contesta a haya un resumen di e desaroyonan te awor, relaciona cu e caso Holloway.

E siguiente resumen ta concerni na locual prensa local a puntra y e contestanan respectivo. Sra. van der Biezen a splica cu e tres hobennan cu kendenan e hoben a worde mira den auto, despues cu el a sali for di e night club concerni, ta worde considera testigo y no sospechoso, y como tal te aworaki si nan kier viaha no tin nada di parti di husticia cu por stroba nan oficialmente.

Tocante e prolongacion di ocho dia riba e detencion di e dos securitynan cu si ta carga e seyo di sospechoso na e momentonan aki, sra. van der Biezen a menciona cu e Fiscal a tene cuenta cu tur loke e investigacion a trece dilanti y como conclusion e ta haya cu tin suficiente base pa por prolonga e detencion.

Van der Biezen no por a contesta mas pregunta di prensa riba loke por worde considera como base pa retene e sospechosonan, pasobra e ta directamente relaciona cu e investigacion y pa no haci daño na e proceso.

Di parti di Papito Comenencia, vocero policial, el a señala cu e investigacion ta sigui cu expertonan di Aruba cu a

haya sosten di hendenan di FBI cu hunto cu e funcionarionan local ta investigando e caso. Comenencia a confirma cu fuera di e dos personanan cu ta deteni no por exclui cu tin mas detencion cu por cay den e caso aki.

Prensa a puntra si e caracter di e caso a cambia, unda cu di desaparicion por papia di algo mas serio, mirando cu ora ta prolonga detencion di sospechoso esaki ta bay riba basenan mas fundamenta.

Sra. van der Biezen di Ministerio Publico a tuma palabra pa contesta e pregunta aki, bisando cu pa ley e caracter di e caso no ta cambia door di e prolongacion di detencion. El a agrega cu probablemente awe Ministerio Publico lo tin mas informacion riba e asunto aki, pero den e encuentro di ayera atardi e solamente por confirma cu e prolongacion di detencion ta relaciona cu e caso di desaparicion di e hobencita ya menciona.

TEAM PA ATENDE TIPS

Tambe a puntra Papito Comenencia si polis ta tene cuenta cu e diferente tips cu hende ta dunando pa medio di entre otro, radio; y si investigacion ta tumando lugar den diferente bario. Comenencia a subraya cu polis tin un team special cu ta averigua tur e tips aki, na unda rapportnan ta worde traha y investigacion ta sigui riba tur e informacionnan aki, y si tin algo cu por sigui riba esaki ta worde haci.

Vocero policial a menciona cu e datonan cu ta worde duna cu e hobencita aki a haci mescos den pasado na otro pais, lo bay worde

averigua tambe. Comenencia a acentua tambe, riba otro pregunta di

prensa, cu e investigacion te aworaki ta limita na nos territorio pero si e lo worde

extende pa otro islanan ta solamente den caso cu esaki ta necesario.

Buskeda di Natalee a sigui ayera cu accionnan na dos cas na Yara y Savaneta

ORANJESTAD (AAN): — Den tur e dianan aki, na varios caminda riba Aruba, accion di buskeda ta tumando lugar pa e hoben Mericano cu ta perdi desde siman pasa.

Dialuna mainta un biaha mas, tabatin un accion policial den cercania di Yaraweg/ Savaneta, na cas di un di e personanan cu tabata involvi desde inicio den e caso di Natalee.

Esaki a sosode a base di informacionnan hopi comprometivo y sigur algun bon tip cu a worde entrega na departamento di Recherche. Loke a mustra prome di ta un cas completamente cera, a bin sali na cla despues cu e homber hoben Hulandes tabata den e cas aki.

Ora autoridadnan a bishita e cas na prome instante, ningun hende a habri porta. Autoridad a bay na cas di e mama di e homber Hulandes y pa despues hunto cu e mama regresa na e cas na Yaraweg, unda pa sorpresa di tur cu tabata e prome biaha na e cas, a bin topa cu e hoben den cas.

Riba Diadomingo tabata circula un noticia na Aruba cu e Hulandes aki ya a sali for di Aruba.



Por spera mas accion den e proximo dianan nos dilanti na diferente lugar, ya cu e meta principal ta sigui pa haya Natalee mas pronto posible.

